

Gban Kaai Ate Pɔɔl A Nmarisi A Saa Siyewa A Te KORINTI DEMMA La

¹ Mi Pɔɔl, ka waai ate Naawen a lueri ayen m chim wa tuimtomo la. Ti suoku ate ba a wi ayen Timoti la a puusi ni.

Mi Pɔɔl, ale a nmarisi gbanƙa de a te nama Kirisita bisaƙa ale a tu chaab teƙ kaai ba a wi ayen Korinti la, ale baai meena ale ka Naawen nuruba ate ba bo nuru baai ate ba a wi ayen Girik la teƙka la.

² Ti Kowa Naawen ale ti Nyɔnɔ Yeezu Kirisita le wa niak ni abe wa nyɛ ate ni boro ale suyɔgini.

³ Ni basi ate ti pak Naawen waai ale ka ti Nyɔnɔwa Yeezu Kirisita Ko la. Wa ka jirim Ko waai ate maarika meena a nyini wa jigi. ⁴ Wa kasim a a maari ti kama daanika meena po, ate ti baga a maari ti suaata daani ka meena po. Ti be pai ka maari kaai ate tama deƙ a nya Naawen jigi la a maari ba. ⁵ Tama abe le maa tuesi Kirisita ninammu a nam la ti be le va wa nyin a nya Naawen maarika yegayega wa kama. ⁶ Tama a dan a nam, ka nama maarika ale ni varibasika nyin. Ti be dan nya maarika nama me a nya maarika kama ale pagrim ate ni baga a chiib ale ninam buui choawa ate tama me a chiibi la. ⁷ Ti seba chak kama ayen ni le nmasi chiibi ate ni kan lo. Tama me be seba ayen nama ale tama ninammu ka bunyi. Ti maarika me ka bunyi.

⁸ M suaata, mi a yaali kama ayen m teeri ni ate ni seba daani kaai ate ti nya Asia la. Va njala po, tama ninammu a jam gaam kama nna yegayega. Ti jam poom poli ayen ti le kpi kama. ⁹ Ku jam a nye a se ba bo ka tama kum buusa la. Naawen ale basi ate wienja de a nye ti jigi, ayen wa sak ti ayen ti ka a poli ayen ti baga ti deka a nya kama. Alege wa a yaali kama ayen ti a nya wa waai ale a nak nuruba a yiti kum po la. ¹⁰ Va njala po Naawen a jam vari ti kum po a basi kama. Ti ta yiila kama ayen wa le njman vari ti a basi kama. ¹¹ Ni be le a puusi nna yegayega a te ti la, Naawen ale tulisi ni puusaja abe wa niak ti, ate nama a te wa jiam tama nyin.

¹² Ti ta kanjanta kama dii la tama deka popola po ti seba chak kama ayen ti boka tenjuk deka, ale tama ale ni ale ka dii la ka Naawen ale maari ti ate ti ta sunum welensa ale popola manja. Ku de be ka Naawen niaka nyin daa nurubiik yammaa.

¹³ M le a njmarisi a te ni dii la, mi a poli ayen m le a weeni dii la, an pagra ate ni kan baga min.

¹⁴ Ni diem ze mu a chak ya, alege mi a yaali kama ayen ni seba mu nalimnyiini, ate ni ta kanjanta m nyin ase ti Nyonowa Yeezu a nin pilim jam.

¹⁵⁻¹⁶ Wienja de nyin, ate m jam yaali ayen m gaam ni a taam ten kaai ate ba a wi ayen Masidoniya la abe m pilim njman jam a nya ni ate ni maari mu ate m baga chen ten kaai ate ba a wi ayen Judia la. M daam dan nye dila, m te jam baga a maari ni ka buye. ¹⁷ M le lin jam a yaali ayen m jam ni jigi ale ge ku njaninyin an jam yaali jamka la, nna a sak kama ayen m ka nuru waai ale kasim a a tagri m popola la? M ta

ka kanjanta ate m weeni ayen m le lin jam ni jigi ale ge nman weeni ayen m kan jam?

¹⁸ Naawen ale mi seero ayen m daa nuru wala choa. Mi ka nuru waai ale wensie nyɔɔ la. ¹⁹ Mi ale Timoti ale nuru waai ate ba a wi ayen Silas ate ti jam bo ale ni la, ti jam sak ni ka Yeezu Kirisita waai ale ka Naawen biik la wie. Wa kan puulim ale ka wa noai nyiini ayen wa le te ni nanta. Wa a tom wa tuimaɲa meena ale ka popola yena. ²⁰ Naawen a jam tom Yeezu kama ayen wa basi ate puulim kaai ate Naawen a jam puulim ku piilim ka po a te nuruba la a chim wensie. Ti a te Naawen jiam ale a te wa zula me wienɲa de nyin. ²¹ Naawen dek ale lueri tama ale nama meena ale ti seba chak ayen ti ta nyuvuri dii ale kan ta kpeglimka la ti le Kirisita ale ka bunyi la nyin. ²² A yaa nmarisi ti nyinɲa ayen wa dek ale soa ti. Wa me pai wa Chiika a nyo ti suniima po kama ate ku sak ayen wa le nyɛ wienɲa de meena a te ti.

²³ Naawen ale mi seero a seba dii ale bo m sunum po la. Mi an nman pilim jam ayen m nya ni, dii nyin la, m dan poom jam, ni te jam wom ka m biik pagrika. ²⁴ Tama kan yaali ayen ti jam sak ni a gum ni ale ta siaka ale Yeezu Kirisita dii la. Ni poom ta siaka ale wa ka nalimnyiini. Ti a yaali ayen ti maari ni kama ate ni sue peenti.

2

¹ M kan yaali ayen m biisi bipagrik ate ku nyɛ ate ni sue nman kaasi. Dila ale soa ate mi an jam ni jigi ya. ² M daam dan poom jam ni jigi ate ni sue kaasi, ka wana ale wa boro a nyɛ ate mi sui a

peenti? Ka nama baai ate mi a nye ate ni sueŋa a kaasi la. ³ Dila ale soa ate m jam ŋmarisi gbaŋka a te ni. Dila me be ale soa ate mi an ŋman pilim jam ayen m nya ni, dii nyiŋ la, nama baai ale ni jam nye ate m sui peenti la, ni te jam nye kama ate di kaasi. Mi dek seba m sunum po ayen wie ŋaai ale bo m sunum po la, ŋa a nye ate nama me sue a peenti kama. ⁴ M le jam ŋmarisi gbaŋka a te ni dii po la, m sui ale jam kaasi nna yegayega ni nyiŋ. M sunni a jam kaasi ka nna yegayega ate m ninyiam a zi m popo. Ni kan te ni sue kaasi, ku de a sak ka mi yaalika ale ni.

⁵⁻⁶ Ni a teeri nuru waai wie ate m jam ŋmarisi m gbaŋka po la, ale wa le basi ni dii la. Wa basi kama ate ni sue kaasi a se wa le nye ate mi sunni a kaasi dii la. M gbaŋka wienŋa a gum ni supuurimu po kama. Va ŋala po ni ba gela a jam waali ku nyɔɔwa kama. Ni be nye dila a nueri ya. ⁷ Ni voŋ a te wa abe ni a te wa nyiŋbiiri ate wa supuurimu a kan te ate wa a basi ni. ⁸ Mi a saalim ni kama ayen ni weeni wa ayen ni a yaali wa kama nna yegayega. ⁹ Dila ale soa ate m jam ŋmarisi gbaŋka a te ni. M jam a yaali ayen m seba ase ni a va m noai wie meena po ya. M jam a yaali ayen m nye ni a nya kama. ¹⁰ Ni dan voŋ a te nuru, mi me voŋ a te wa kama. Mi a nye dila kama dii nyiŋ la, mi a yaali ayen m maari ni kama. Ku a nye se Kirisita a nya m le a nye dii la kama. ¹¹ Ti seba Sitaana ale kasim a a tom dii la. Dila ale soa ate ku a fe ayen ni va siuku dila ate wa kan baga a nak ni a yiagi.

¹² M le jam paari teŋ kaai ate ba a wi ayen Torowas la, ti Nyɔɔwa a jam te mu ka

siuk nalimnyiini ayen m sak nuruba Kirisita wamaɗsaɗa. ¹³ Alege ku jam daani mu yegayega m le jam kan baga a nya suoku Titus la. Dila ale soa ate mi an jam bo ale Torowas demma a beni ya ale ge cheɗ teɗ kaai ate ba a wi ayen Masidoniya la.

¹⁴ Ni basi ate ti a te Naawen jam. Wa basi kama ate tama ale Kirisita a chim bunyi. Wa soa ti kama yogyogla. Wa kasim a basi ti kama ate ti a nyeem a sak nuruba ate ba nya siuk a seba Kirisita. ¹⁵ Ti le a sak nuruma dii la a peenti ka Naawen sui nna yegayega. Baai ale a wom wa wamaɗsaɗa a magsi chaab ale Yeezu la, Naawen a vari ba tuimbaata po kama a basi ate ba a wa wa. Baai ale a zeri wa wamaɗsaɗa womka la, Naawen le nya ba kaasunku ate wa basi ba ate ba kan ta kiri ya. ¹⁶ Jigi meena ate ti ga a paari la, ti a nyun ka nna biokbiokwa baai ate Naawen le basi ate ba kan ta kiri la nyue po. Alege ti a nyun ka nna masimasiga baai ale nya varibasika la nyue po. Ka wana dek ale pagrɔ ate wa tom tuimaɗa de a te Naawen ya? ¹⁷ Nuruba yegayega ale a sak nuruba Naawen wamaɗsaɗa wie ale ba noa po nyiini, ayen ba nya nyuenta a te ba dek. Tama kan nye se nuru bala la chaaba. Naawen a tom ti kama ayen ti a sak nuruba wa wie ale popola yena. Ku a nye se Naawen a nya ti kama la.

3

¹ Tama nman a sak ti dek nama niɗa? Ti a yaali ka gban nama jigi ayen ti seba ni wamaɗsa yaase nama a yaali gban tama jigi ayen ni seba

tama wamaɗsa. ² Nama deƙ a nyɛ se ka gbanɗa a ŋmarisi ti suniimaɗa nyiɗ ate waai meena a karim la. ³ Naawen waai ale vua la, a pai wa chiika a nyo ka mi sunum po. Dila ale soa ate ni a nyɛ se Kirisita gbanɗ kaai ate ti ŋmarisi la. Naawen ale nyɛ dii la a basi kama ate ni gaam wa le jam ŋmarisi wa sinsaɗɗa a dueni tintain paglagsa zuk la.

⁴ Ka Yeezu Kirisita nyiɗ ate ti ta siaka ale Naawen. Dila ale soa ate ti a weeni nna a sak ni. ⁵ Tama an baga pai ti deƙ pagrim a tom a te Naawen ya. Wa a pai ka wa pagrimu a te ti ayen ti a tom tuima a te wa. ⁶ Wa a maari ti kama ate ti a weeni a sak nuruba wa ale ba ale ŋman nyɛ noai yeɗ ale chaab dii ate wa a yaali ayen wa Chiika a jam bo ba suniima po la. Naawen ale a nyɛ dii la a zuak ka yegayega a gaam wa le pai wa sinsaɗɗa ŋaai ate wa jam pai a te Moosis dila po, dila po la. Va ŋala po ate nuruba an jam wa wa sinsaɗɗa a ga paari ku kpeglimka la, ba jam kpi kama. Naawen Chiika a dan bo ba suniima po, ba le ta ka nyuvuri dii ale kan ta kpeglimka la.

⁷ Naawen a le jam pai wa Sinsaɗɗa a te Moosis dila po, dila po la, Naawen a jam ŋmarisi ŋa a dueni ka tintain paglagsa nyiɗ. Moosis ale jam nya Naawen zulaɗa ale wa nalimu yegayegaka la, Moosis nimbidiaka me a yaa jam a nyagsi ka nna yegayega. Moosis ale pilim ŋman cheɗ Izirali demma jigi la, wa ninaɗa ale jam nyagsi dii la a jam boro a basi kama, alege an diem basi meena ate nuruma an jam baga a nya ŋa. Naawen a jam pai wa zulaɗa ale wa nalimu

yegayega a vi ka wa sinsan̄a zuk, ɲaai ale a nyɛ ate nuruba a kpi, ⁸ alege Naawen a pai wa zulaɲa ale wa nalimu yegayegaka a nyo wa Chiika po waai ale a basi ate nuruba a nya nyuvuri dii ale kan ta kpeglimka la. ⁹ Wa sinsan̄a ɲaai ale a nyɛ ate Naawen a nya nuruba kaasun̄ la a te Naawen zula kama. Alege wa Chiika waai ale a basi ate nuruba a chim wayɔrisima nyam Naawen jigi la, ale soa Naawen zulaɲa ale wa nalimu gaam wa sinsan̄a ale soa dii la. ¹⁰ Zula ɲaai ale wa nalim buui ate Naawen a pai te wa Chiika la ale basi ate zula ɲaai ale nalim buui ate wa jam pai te wa sinsan̄a dila po, dila po la a taam. ¹¹ Naawen sinsan̄a ɲaai ale soa wa zulaɲa ale wa nalimu yegayegaka an jam beni ya. Wa Chiika a boro kama taam wuu. Dila ale soa ate wa zulaɲa ale wa nalimu yegayegaka a gaam Naawen sinsan̄a zula ale ɲa nalimu yegayegaka.

¹² Wien̄a de nyin̄ ale soa ate tama ta suniima pagrisa a sak nuruba Naawen ale nyɛ dii a te ti la. ¹³ Tama kan nyɛ a se Moosis waai ale jam pai garuk a lik wa nimbidiaka ayen Izirali demma a kan бага a nya Naawen nalimu ale bu le a a basi wa nimbidiaka dii la. ¹⁴ Dila la ba popolaɲa a jam lik kama. A ta jam paari jinla ba popolaɲa a nyɛ se ka garuk ale lik ɲa la ase ba nin boro a karim sinsan̄a. Alege waai ale a siak Kirisita la garuku a zagri kama. ¹⁵ Alege jinla ba dan a karim Moosis Sinsan̄a garuku a diem a lik ba popolaɲa kama. ¹⁶ Alege garuku a бага a zagri kama ase Naawen gban̄ka ale weeni Moosis wie dii la, ayen, “Wa le jam pilim a ɲmari Nyɔnɔwa

jigi la wa garuku a jam zagri kama.” ¹⁷ Yogyogla de nyɔɔwa dela abe le Chiika, Chiika abe le a bo juijui meena la varibasika a boro kama. ¹⁸ Tama meena abe a nyagsi kama a sak Nyɔɔwa jigi, wala abe le Chiika a tagri ti ate ti a neensi wa ale a sak wa zulaɲa ale zuak dii la.

4

¹ Naawen waai ale ta jiirim ale ti la, a lueri ti kama ayen ti a sak nuruba wienɲa de. Ti kan pai ɲaɲ a te tuim ɲaai ate wa pai a te ti la. ² Tama kan sugi a tom tuimbaata ate ti nya chivie. Ti kan a paasi nuruba, ale a pai ti deƙ sinsaga a gum chaab ale Naawen ale sak ti dii la. Ti kasim a sak nuruba peelim niɲ wa wensienɲa ayen waai meena a siak ba suniima po ayen ti ka Naawen ɲaɲviiriba. ³ Nuru boari a kan wom Naawen wamaɲsaɲa ɲaai ate tama pai a sak ba la. Naawen le jam nya ba kaasunƙu kama abe wa basi ate ba kan ta kiri ya. ⁴ Ba an бага a ta siaka ale wa wamaɲsaɲa. Ku a nye se ka kantueɲ ale nak nuruba suniima po la, alege Sitaana waai ale soa teɲzuk nuruma la, ale kaasi ba popola. Yeezu Kirisita ale Naawen wamaɲsaɲa. Wa sunummu a nye se ka Naawen sunum la. Naawen a chari wa zulaɲa ale wa nalimu yegayegaka ale wa. ⁵ Tama kan sak nuruba ka ti deƙ wie. Ti a sak ba ka Yeezu Kirisita wie, waai ale ka ti Nyɔɔ la. Wala nyiɲ ate ti chim ni tomteeroba. ⁶ Naawen ale jam nye teɲka dila po, dila po la, wa jam weeni kama ayen, “Basi ate legini a chim kantueɲ.” Wa biika Yeezu Kirisita a pai Naawen

zulaŋa ale wa nalimu a sak ti kama. Nna a nyɛ se ka danni kantuenka a nya ti suniimaŋa po.

⁷ Alege Naawen nyɛ tama baai ale ta kantuenka de yegayega la, ate ti a nyɛ se ka yak samonsa la. Wa nyɛ ti dila kama ayen wa baga a sak nuruba ayen wa pagrimu yegayegaka de an nyini ka tama jigi. Bu nyini ka wa dek jigi. ⁸ Ti a nam ka yegayega daa meena, alege ti baga a siak ate ti ninammu kama. Ti ze siuk kuui ate ti a va la, alege dila kan daani ti. ⁹ Dachaasa ale gisi ti, alege Naawen a kan yaali ayen ti lo ba nisima po. Nuruba dek me a nak ti kama a lonsi, alege ba kan ko ti. ¹⁰ Yeezu a jam nam ka tama nyiŋ. Dila ale soa ate ti gomsɪ ti dek daa meena a kpi wa nyiŋ. Wa ale a nya ti zuk dii la a sak nuruba kama ayen wa bo ka ti suniima po. ¹¹ Daa meena ti kasim bo ka kum nisima po Yeezu nyiŋ, ayen ku sak nuruba ate ba seba ayen wa vuusumu buui ale bo ti suniima po la ale a nya ti zuk. ¹² Ti le bo kum nisima po nna daa meena la, nama me be bo Naawen Chiika bui ale kan ta kpeglimka ate bu bo ni suniima po la nyiŋ.

¹³ Ba ŋmarisi Naawen gbanka po ayen, “M jam biisi ale Naawen kama, dii nyiŋ la, m jam ta siaka ale wa kama.” Wa Naawen Chiika ale basi ate ti ta siaka ale wa, ayen ti a sak nuruba wa wie. ¹⁴ Tama seba ayen Naawen waai ale nak ti Nyɔnɔwa Yeezu kum po a yiti la, a le nak tama me a yiti kum po a se Yeezu la, abe wa basi ate tama ale nama a tigi chaab a zaani wa niŋ. ¹⁵ Ti a nam nna ka Yeezu ŋaanviirima nyiŋ. Naawen niaka abe le a paari nuruba yegayega ba puusi a te wa zula ale jiam.

¹⁶ Wienja de nyiŋ ale soa ate ti kan jok nyiŋbiiri. Ti nyiŋsaŋa a boro a kpaŋi kama, alege daa meena Naawen a gum wa nyuvuri dii ate wa pai a te ti la kama. ¹⁷ Ninam buui ate ti a nam yogyogla la, bu kan beni. Bu dan ga nueri, Naawen le pai wa nalim kpionku buui ale kan ta kpeglimka la a te ti. Wa nalim kpionku de a gaam ka ti le a nam yegayega dii yogyogla la. ¹⁸ Ti niŋ ka ale tenzuk de ŋanta baai le kan a beni la. Ti niŋ bo ka ŋanta baai ate Naawen le pai te ti dai yeŋ la. Nantaŋa de a le kasim boro kama taam wuu.

5

¹ Ti nyiŋsaŋa a nye se ka viita ate nuruba a ti zaani la. Ti dan jam kaasi, Naawen le pai ti kama a ta cheŋ wa wenŋmazuk a ga te ti nyiŋpaalisa sii ate wa dek a nye la. Ti le ta nyiŋsaŋa de kama taam wuu. ² Yogyogla de tama a kum ale a yaali ka nna yegayega ayen Naawen pai ti a ta cheŋ wenŋmazuk a ga te ti nyiŋpaalisa dula. ³ Wa dan nye dila, ti chiisaŋa a kan jogi nyiŋsa. ⁴ Yogyogla de nyiŋ sii ale a nye se viita la, ale basi ate ti a nya ninammu. Ti kan yaali ayen ti basi ti yogyogla de nyiŋsaŋa nwuli, alege ti kasim a yaali kama ayen Naawen le pai nyiŋpaalisaŋa a te ti ate ti zaani si naŋkula po. Wa dan nye dila, yogyogla de nyiŋsaŋa le si jam kpi la, ale si chim wa nyiŋpaalisaŋa la. Si ta ka nyuvuri dii ale kan ta kpeglimka la. ⁵ Naawen ale nye ti ayen ti tuesi wa nyiŋpaalisaŋa. Wa pai wa Chiika a te ti kama ayen Chiika a liŋ chim wa tutuna ŋaai ate wa le tuni ti la, ate ku sak ayen wa le sum tuni ti kama.

⁶ Dila ale soa ate ti sue kasim peenti la. Tama seba ayen ti le diem vua yogyogla la, ti an diem baga a zaani ti Nyɔnɔwa niŋa. ⁷ Ti kan nya ale ti dek nina Naawen le wa tom dii la, ale ge ti ta siaka kama ale wa a le weeni dii la, ayen ku le sum chim wensie. ⁸ Ti sue peenti kama nalimnyiini. Tama kan chali yogsum ale kum. Ti dan poom kpi, ti le moata ti Nyɔnɔwa kama. ⁹ Ti dan bo dula a yaa se ti moata wa wenɲmazuk, ku a fe kama ayen ti nina muni ate ti a nye ate Naawen sui a peenti. ¹⁰ Ti dan kpi, ti meena le cheŋ ga zaani ka Yeezu Kirisita niŋ ate wa bo ti buusa. Ti le tom tuimmaŋsa a yaa se tuimbaata ale ti yogyogla de nyiŋsaŋa la, wa le tuni ti kama ŋa nyiŋ.

¹¹ Ti le a chali ti Nyɔnɔwa la nyiŋ, ale soa ate mi a yaali ayen m sak ni ayen ti a tom Naawen tuimaŋa ale ka wensie. Wa dek seba ayen ti a tom wa tuimaŋa ale ka wensie. M seba ayen nama me le nye ka dila. ¹² Ti an ŋman a yaali ka yue a te ti dega. Ti a te ni ka siuk ayen ni ta kanjanta tama nyiŋ, ate ni baga a biisi sak baai ale a nya nuruba peelim tuima alege kan nya ba suniima po la. ¹³ Ti daa biisi nna, ni ba gela a poli ayen ti a yesiŋ kama yaa? Ti daa yesiŋ kama, ti a yaali ayen ti a te zuli ka Naawen di nyiŋ. Ni ba gela a poli ayen ti ta nyiŋyogsa? Ti dan ta nyiŋyogsa, ku ka nama nyiŋ. ¹⁴ Yeezu Kirisita mariŋ ti ka nna yegayega. Tama seba ayen wa zaani ka nuru meena nanŋkula po a kpi ba nyiŋ. Wa le mariŋ ti dila la nyiŋ, ale soa ate ti nina muni ale wa tuimaŋa tomka. ¹⁵ Wa kpi

ka dila, ayen baai ale ta wa nyuvuri dii ale kan ta kpeglimka la a kan nman va ba dek yaalika, alege ba le va ka waai ale kpi ale ge yiti kum po bala nyin la.

¹⁶ Dila ale soa ate tama an nman a bo nuruba buusa a se tenzuk nuruma la. Ti jam a bo Yeezu Kirisita buusa ka dila, alege yogyogla de, ti an nman a bo wa buusa. ¹⁷ Nuruba a dan tagri ba popola a va Yeezu Kirisita, Naawen a tagri ba popolaŋa kama ale ge a nye ba ate ba chim nuru paalisa. Ba popola kpagsaŋa a nman karo dii po, dii po. ¹⁸ Naawen nye wienja de meena a te ka tama. Yeezu Kirisita kumu nyin ale soa ate Naawen a nman a yaali ayen wa nye noai yeŋ ale tama. Naawen nman a yaali kama ayen ti a weeni wa wie a sak nuruba, ate wa ale bala me a nman nye noai yeŋ. ¹⁹ Yeezu Kirisita kumu nyin ale soa ate Naawen a nya siuk a basi ayen wa ale nuru meena a nman nye noai yeŋ, ate wa kan nman a teeri ba tuimbaataŋa. Wa wamaŋsaŋa de ate wa pai a nyo tama nisima po ayen ti a sak nuruba.

²⁰ Yeezu Kirisita ale tom tama ni jigi, ayen Naawen baga a biisi wie a sak ni. Ti a saalim ni kama Yeezu Kirisita nyin, ayen nama ale Naawen a nye noai yeŋ a nueri. ²¹ Yeezu Kirisita ale jam bo tenzuk la, wa an jam tom tuimbaata ale fiifik me, alege tama tuimbaata nyin ate tama ale wa a chim bunyi ayen ti baga a nya Naawen welensaŋa.

6

¹ Tama ale maari chaab a tom Naawen tu-

imaṅa ale a saalim ni ayen ni pai Naawen ale maari ni dii la a tom tuima a te wa. ² Ba ḡmarisi wa gbaṅka po dila po, dila po ayen,

“Dii po ale magsi ayen mi a wom ni a sak jiiirim ale ni la,

mi wom ni kama.

Ku danni ale paari ayen m vari ni a basi la, m maari ni kama.”

Ni be wom, dii po ale magsi ni siak Naawen la ale nna, jinla ale da dii dai ate ku magsi ayen ni nya varibasika.

³ Ti kan yaali ayen waai a nya ti tuimaṅa ate ti a kpesi ti dek ayen ti kan nye wari wari ate ku kaasi nuruba suite. ⁴ Ti tuimaṅa meena a kasim a sak nuruba kama ayen ti ka Naawen tomteeroba. Ba a nye kama ate ti a nam nna yegayega, alege ti siaka a te ti ninam kama ale chichiiba. ⁵ Daa meena ba kasim a a nak ti kama ale ge a yik ti a lik diina po. Nuruba me a jam nyini satensa togatoga a tu chaab a nye noai yeṅ a yaa a tom tuim kaasima tama nyiṅ. Daa meena ti kasim a tom kama ate ti ga jiaḡ, an poom ḡman a yaali ḡandiinta a yaa se ti duak a goa. ⁶ Ti ka welensa nyam, ti be seba Naawen nalimnyiini ale ta chichiiba me ale nuruba, ale ge seba ti dek yikka, ti be ta Naawen Chiika ti suniima po kama, ti be ta yaalika nalimnyiini ale ti vaanchaab, ⁷ ale maari sak nuruba ale Naawen pagrimu wa wensie wienḡ. Wienḡ de meena a sak nuruba kama ayen ti ka wa tomteeroba. Ti ta ka welensa ase kpaliṅ jaab la ayen ti бага a kpalim vari ti dek a basi. ⁸ Nuruba a te ti zula ale a basi ate ti a nya chivie. Ba a pak ti kama

ale ge a le ti me. Ti a biisi ka wensie ale ge ba a weeni ayen ti ka velinwendisa. ⁹ Ti daa nuru kpeenta alege waai meena seba ti noai po kama. Ti a nye se ka kpeeba la, alege ti ta nyuvuri kama. Ba a nye kama ate ti a nya ninam, alege ba an diem ko ti. ¹⁰ Ti sue kasim kaasi kama, ale ge na peenti kama yegayega. Tama ka nanjagsa ale ge ti a maari nuruba ate ba a jigsi. Nuruba a poli kama ayen tama ka jaabjaabaa, alege, tama dek seba ayen ti soa ka nanta meena.

¹¹ Nama Korinti demma, wariwari an tali ya ate nman weeni sak ni gbanƙa de po. Ti lak ti suniima meena a te ni. ¹² Daa tama ale kan lak ti suniima a te nama alege ka nama ale kan lak ni suniima a te tama. ¹³ Yogyogla de ti a yaali ayen ti biisi ale ni kama a se ni ka bimbaansa la. Ni sak ase ni a yaali ti kama me a se tama ale a yaali ni dii la. Nama me lak ni suniima a te tama me.

¹⁴ Nama ale baai ale kan ta siaka ale Naawen la, ni kan a tigi chaab a tom tuima ale ba. Tuimbaata ale tuimansa kan gum chaaba. Legi ale kantueɗ me a kan gum chaaba. ¹⁵ Yeezu ale Sitaana a baga a nye noai yeɗa? Nuru baai ale ta siaka ale Naawen la, ale nuru baai ale kan ta siaka ale wa la, a baga a nye noai yeɗa? ¹⁶ Tama ka Naawen waai ale boro la yeri. Ti be dan ka dila, tama ale bogluta ale nye ka se boro ale chaaba? Ba nmarisi Naawen gbanƙa po ayen Naawen weeni ayen,

“Mi ale m nuruma ale boro ka dila a ta a chen, ale ge ate m chim ba Naawen ate ba me a chim m nuruba.”

¹⁷ Naawen be ŋman weeni ayen,
 “Ni poori ni dek a ta nyini baai ale a kaab bogluta
 la po, ate ni kan maa tiri ba ŋanta.

Ni daa nye dila, mi dek ale tuesi ni.

¹⁸ M le chim ni ko,
 ale ge ate nama me chim m bisa.
 Mi, Naawen, waai ale soa ŋanta meena
 pagrim la, ale a weeni nna.”

7

¹ M dek doaba, wienja de ka Naawen pumpu-
 ulima ate wa jam puulim ale ti. Ni basi ate ti
 yeeri ti dek wa ŋaai ale a basi ate ti a chim nuru
 danɗisa la, abe ti chim nuru welensa a te Naawen
 zula.

² Ni lak ni suniimaŋa a te ti. Ti an jam tom
 tuimbaata a te nuru waai ya. Ti be an jam yaali
 degaamka a yaa se ti jam paasi nuru waai ya.

³ Ti kan weeni nna a sak ni ayen ka ti nya ni
 kaasunja. Ti poom weeni a sak ni ti ni a yaali
 ni nna yegayega la. Ti dan poom kpi a yaa se ti
 vua, ti le diem ta ni ka ti suniima po. ⁴ Ti ta siaka
 ale ni ka nna yegayega dii nyin la ti ta kanjanta
 kama ni nyin. Ni a denɗi ka ti kpa ti ninammu
 po, ate ti sue a peenti daa meena.

⁵ Ti le jam paari Masidoniya tenka la, ti an
 jam nya vuusum. Jigi meena ate ti jam chen
 la, ti kasim jam a nya ka daanika ale kpaliŋsa
 ale kpazinagsuk. ⁶ Alege Naawen waai ale a te
 nyinbiiri baai ale a nam la, ale jam tom Titus la
 ayen wa jam denɗi ti kpa. ⁷ Ti sue a jam peenti
 kama ale ti le jam nya wa ale wom wa wapaaliŋa
 ale ni le jam denɗi wa kpai dii la. Wa weeni ti

ayen ni a yaali ayen ni nya ti ka nna yegayega. Wa weeni sak ti me ayen ni sue a kaasi kama, ale ku le jam daani ni dii la. Wa weeni sak ti me ni niŋ ale bo le ti dii la. Ku de basi kama ate m sui a ŋmasi peenti nna yegayega.

⁸ M le liŋ jam ŋmarisi gbanj kaai a te ni la, ni sui a jam kaasi ka nna yegayega, alege m le jam wom ayen ni sue a jam kaasi beni la, dila a ŋman jam peenti m sui kama. ⁹ Alege yogyogla de mi sui ale peenti la, daa m le nye ate ni sue kaasi la nyiŋ ŋa alege ka ni sueŋa kaasika ale basi ate ni tagri ni nyeka la. Naawen deŋ abe le pai ni sueŋa kaasika a tagri ni. Dila la mi an kaasi wariya. ¹⁰ Ni sueŋa ale kaasi dii la a nye kama ate ni basi ni tuimbaata tuimaŋa ale tagri ni nyeka. Ti dan nye dila, dai yeŋ wa le бага vari ti nalimnyiini ti tuimbaata po a basi. Dila daa wari dii ate tama le yaali ayen ti zeri la. Nuru waai ale kan a yaali ayen Naawen kaasi wa sui la, dai yeŋ, Naawen le jam nya nuru wala choa kaasunŋku abe wa basi wa ate wa kan ta kiri ya. ¹¹ Ni le basi ate Naawen a kaasi ni sue la nyiŋ ale soa ate ni a yaali ayen ni sak ayen dii meena ate ni a nye la ka wamaŋsa. Ni sue abe kasim a puuri kama alege ate ku cha ni nna yegayega ate ni kasim a yaali ayen wie a nye a magsi. Ni chiib a sak kama ayen wannu de ni nye magsi kama.

¹² Ti an jam ŋmari gbanjka ayen ti le ka waai ale tom wabioku la, yaase waai ate wa nye wa kaasi la. Ti jam ŋmarisi kama me ayen Naawen sak ni le diem ta yaalika ale tama dii la. ¹³ Ni te ti nyiŋbiiri ka nna yegayega ale weeni ti ni le te wa nyiŋbiiri dii la, ti sue a jam peenti kama

a gaam ɗa le poom liɗ peenti dii la. ¹⁴ Titus ale jam basi dula ayen wa cheena nama jigi la, ti jam weeni kama ayen ti ta ka kanjanta ni nyiɗ. Nin jam basi ate ti nya chivie. Ti kasim jam a biisi ka wensie wie ale ni. Ti le jam weeni Titus dii me la, a jam ka wensie. ¹⁵ Wa a teeri ka ni le jam tuesi wa dii ale jam pai ni dek a te wa ale ge gomsɗi ni dek ayen ni va wa noai la. Yɔgyɔgla de wa a yaali ni kama dila nyiɗ a gum du. ¹⁶ M sui peenti ka nalimnyiini ate m ta siaka ale ni nna.

8

¹ M suaata, ti a yaali ayen ka ni seba Naawen ale a niak baai ale bo Masidoniya tenka po a va Yeezu la. ² Ba jam nya ninam yegayega, alege ninammu de po, ba sue diem peenti kama nalimnyiini. Ba ka ɗanjagsa nalimnyiini alege ba pai ka ba ɗanfiisana ba gela a te nuruba. ³ Mi ka ba seero. Ba jam pai ba ɗantaɗa a te ka ba vaanchaab a poom gaam ku le magsi dii te ka la. Ba jam te ale ka ba dek yaalika. ⁴ Ba jam saalim ti kama ayen ti tuesi ba tiirintaɗa ate ti baga maari Naawen nuruma baai ale bo niɗniɗ la. ⁵ Ba tiirintaɗa a jam zuak gaam tama le jam a poli dii la kama. Ba liɗ jam pai ka ba dek a te ti Nyɔnɔwa ale ge pai ba dek a te tama me a va Naawen ale a yaali dii la. ⁶ Dila ale soa ate ti a saalim Titus waai ale poom deri piilim a tuesi ni tiirintaɗa la, ayen wa maa maari ni ate ni cheesi tiirintaɗa meena a te wa. M seba ayen ni le nye nna kama, dii nyiɗ la, ni a yaali ayen ni maari ni vaanchaab ka yegayega. ⁷ Ni be jigsi kama ale ɗanta baai meena ate ni ta la. Bala le ni siaka

ale ni ale seba biik la, ale ni ale ta yam la, ale ni ale a maari nuruba la, ale ni ale a yaali tama dii la. Ti a yaali kama ayen ni a te yegayega.

⁸ M kan yaali ayen m weeni sak ni ku le magsi ni le nye dii la, alege m poom weeni sak ni ayen baai ale bo Masidoniya tenka po la, nina a jam muni kama ale ba vaanchaab maarika nna yegayega. Ma yaali ayen m nye ni a nya kama a se ni ta yaalika ale ni vaanchaab a se bala ale a yaali nama dii la ya. ⁹ Nama seba ti Nyɔɔwa Yeezu Kirisita ale jam niak ti dii ale jam a maari ti nna yegayega la. Wa jam chim ka jajak tama nyin ayen ti tuesi wa ntanta.

¹⁰ M dek popola ale m yaalika ate maa weeni wienja de a sak ni. Diimwa, ni nina a jam muni kama ate ni jam piilim ni ntanta Titus pai te ka. Yɔgyɔgla de, ni tom dii ate ni piilim la a nueri. Nama le lin jam piilim poli dila nyeka. ¹¹ Ni tom dii ate ni piilim ayen ni tom la a nueri. Ni jam piilim di ale ka nin muni. Ni be diem basi ate ni nina muni ate ni tom ni le baga dii a tom la a nueri. ¹² Ni dan kasim a yaali nna yegayega ayen ni pai ni ntanta a te nuruba, Naawen le tuesi ni tiirimu. Wa nin karo ale ntanta baai ate nin baga a te la. Wa nin boro ale ka ni le baga ntanta baai a te la.

¹³ M kan yaali ayen m nye ate ku toa, a yaa se m nye me ate ku chim moli a te baai ate ni a maari la. ¹⁴ Yɔgyɔgla de, ni ta ka nan bori. Dila ale soa ate ku nala ayen ni pai ni ntanta ba gela a maari baai ale a yaali ba la. Ba dan ta ntanta piisi ate nama me a yaali, ba le maari ni kama. Ku dan nye nna, ni ni ta soa ase chaab la.

¹⁵ Ba nmarisi Naawen gbanƙa po dila po dila po a weeni Naawen ale jam nye dii a pai nandiinta a te wa nuruma dii po ate ba jam bo sagini po la, nuru waai ale nya yegayega la a nmasi nya gaam taam ya, nuru waai me ale nya magi dek la an posim wa.

¹⁶ Ti a pak Naawen ayen Titus a jam pii ka nyin ayen wa maari ni a se tama ale jam pii nyin dii ayen ti maari ni la. ¹⁷ Mi le weeni Titus ayen wa nman pilim jam puusi ni la, wa sui a jam peenti kama. Wa jam a yaali ka nna yegayega ayen wa nman pilim jam ni jigi. Wa an jam poom a yaali ayen m weeni dila ale wa. ¹⁸ Ti a tom ka ti suoku wanyi ayen wa va wa a jam ni jigi. Yeezu njanviirima meena a te ti suoku dila ka zula yegayega, dii nyin la, wa sak nuruba yegayega Naawen wamaɗsaɗa. ¹⁹ Ba lueri wa kama ayen wa ale tama a pai ni tiirintaɗa a ta cheɗ ga te Yeezu njanviirima baai ale bo teɗ kaai ate ba a wi ayen Judia la. Nna le te ti Nyɔɔwa ka zula, ate ku sak nuruba ayen ti a yaali ayen ti maari ba kama.

²⁰ Ti kan yaali ayen ti nye wari ate waai a fobli ayen tama an pai tiirimu a nye wamaɗa. ²¹ Ti a yaali ayen ti nye ka wari dii ale magsi ti Nyɔɔwa ale nuruba nin la.

²² Ti a tom ka nuru wa choa, waai ale saa baye la, ate ba jam ni jigi. Wa va ale Titus ale ti suok kunƙula a cheɗ. Ti nye wa nya kama dii choa ate ti yaa seba ayen wa pii ka nyin a yaali ayen wa maa maari ti ale ti tuimaɗa. Wa seba ayen m seba ni chak kama nalimnyiini. Dila ale soa ate wa pii nyin a yaali ayen wa gum chaab ale

mbala a jam maa maari ni nalimnyiini. ²³ Titus ka waai ale a tom ale mi ate mi ale wa a maari nama meena. Kirisita bisaŋa ale a tu chaab jiga togotoga la ale tom mbala bayewa. Ba be a te Kirisita ka zula. ²⁴ Ba dan jam ni jigi, ni tuesi ba abe ni basi ate ba seba ayen ni a yaali ba kama. Ni dan nye dila, Kirisita bisaŋa ale a tu chaab la ale tom ba la, ale siak ayen ni sum ka ba nuru baai ate ba ta kanjanta ba nyin la.

9

¹ Kuna magsi m nman nmarisi gban a te ni a weeni ni le ni a maari Naawen nuruma dii la. ² M seba ni ale a yaali ayen ni maari ba dii la. M weeni Yeezu njanviriima baai ale bo Masidoniya tenka po la, ayen ba suaataŋa nama baai ale bo ten kaai ate ba a wi ayen Akaaya po la, a piilim ba cheesika ka diimwa. Ba le jam wom ale ni pii nyin a yaali nna nyeka la, ba gela me a maa chaab a cheesi. ³ Yogyogla de, maa tom ti suaataŋa de ni jigi kama ayen ti kunkuulimaŋa a kan chim kinla. Alege ba ale ba jamka ale ni gomsu ayen ni maari. ⁴ Mi ale Masidoniya demma ba gela a dan jam nya ale nin nye wariwari ya, ti le ta siaka ale ni dii la ale tagri chim ka chivie. Nama me le nya ka chivie nna yegayega. ⁵ Mi abe poli kama ayen ku magsi ka ti suaataŋa de mi nin a jam ni jigi a tuesi tiirim buui ate ni puulim la. M dan ga jam ale ni gomsu magsi a te ku sak ayen ba an fe ni kama alege ka ni dek yaalika.

⁶ Nama meena seba ayen kpaaro a dan bori magla, wa a che ka magla, alege wa dan bori

yegayega wa a che ka yegayega. ⁷ Waai meena a te a magsi chaab ale wa deƙ popola. Wa kan te wa tiirimu a se ku ka fiƙoƙ ayen wa te la. Wa be kan te abe wa ŋman pilim a ŋma wa deƙa. Naawen a yaali ka baai ale a te ale supeentik la. ⁸ Ni dan a nye dila, Naawen le ŋman te ni kama a gum du ate ku zuak gaam ate ni kasim ta yegayega ni deƙ a be ni a te nuruba me. ⁹ Ba ŋmarisi Naawen gbanƙa po dila po, di la po a weeni ayen,

“Naawen a te ŋanjagsaŋa ŋanta ale ka wa deƙ yaalika.

Wa tuim maŋsaŋa tuimaŋa ale kasim boro kama taam wuu.”

¹⁰ Naawen ale a pai ŋanbeenja a te kpaaroma ayen ba bori ŋa ate ba nya ŋandiinta. Dila degadega ate wa le pai wa ŋantaŋa a te ni a gum du ate ni baga a maari ni vaanchaab. ¹¹ Wa kasim a yaali kama ayen ni pai ni ŋanboanni po baai ate wa te ni la a maari ni vaanchaab. Tama a dan pai ni tiirintaŋa a te baai ale a yaali ni la, ba le pak Naawen kama nama nyin. ¹² Ni a maari ba kama ba ninam yegayegaka po ale ge ate ba me, a te Naawen pimpauk yegayega. ¹³ Ni dan a maari nna yegayega, ni a sak nuruba ayen nama a va ka Naawen wamaŋsaŋa ŋaai ale a biisi Yeezu Kirisita wie nalimnyiini la. Ba le te Naawen zula yegayega, dii nyin la, ni a maari ba kama ale nuru meena yegayega. ¹⁴ Ba le ta yaalika ale ni abe ba puusi te Naawen nama nyin, dii nyin la wa niaka yegayega ate wa pai sak ni la. ¹⁵ Naawen a pai wa biika a te ti kama. Wensie, nya ku de a gaam ka ŋanta meena. Dila

ale soa ate ku a fe ayen ni basi ate ti a te wa jiam.

10

¹ Ni ba gela a weeni chaab kama ayen mi dan bo ale ni m seba m dek yik kama, alege m dan yalima ale ni, mi a nmarisi ka wa pagrisa a te ni. Yeezu Kirisita a yaali kama ayen m seba m dek yik ale ni. Dila ale soa ate mi, Pɔɔl, a saalim ni yɔgyɔgla ayen, ² M dan jam ni jigi, ni kan ni fe mu ayen mi a biisi ka wa pagrisa a sak ni. M dan jam tu chaab ale baai ale a weeni ayen ti a va ka ti dek n̄an yaalik la, m le biisi ka wa pagrisa a sak ba. ³ Ku ka wensie ayen ti bo ka tɛnzuk, alege ti kan va ti dek n̄an yaalik a se tɛnzuk nuruma ale a va ba dek n̄an yaalik dii la. ⁴⁻⁵ N̄anta baai ate tama a pai a nyɛ ti kpalin̄ka la daa tɛnzuk n̄anta alege ka Naawen ale a te n̄anta bala, bala abe le wa pagrimu ate ti pai a kaasi n̄an pagrisa meena. Ti pai kama a kaasi nampaga ale kanjanta nyeka meena ale a kasi nuruba ate ba kan seba Naawen la. Alege a yik ba popolaɗa ate ba a zuli Yeezu Kirisita. ⁶ Ti a poli kama ayen ti dan jam ni jigi, nama meena le kasim a va ka Yeezu Kirisita nalimnyiini. Ti dan jam nya ale ba gela a kan va wa nalimnyiini, ti le waali ba kama.

⁷ Ni ba gela a nya ka ti nimbidaasa po nyiini, alege kan nya ti suniima po. Ni ba gela a poli ayen ka Yeezu Kirisita ale soa ni? Ni be maari poli ayen wa soa tama me a se ka wa le soa nama me dii la. ⁸ Ti Nyɔnɔwa ale pai wa pagrimu a te ti ayen ti a maari ni abe ti kan a te ni waalika. Ti dan poom ta kanjanta ku de nyin̄ chivie a kan

yik ti. ⁹ Ti kan yaali ayen ku nyɛ ase ti a nyigsi ni kama ale ti gbanɗa la. ¹⁰ Nuru waai ale weeni ayen m dan yalima ale ni m gbanɗa a sueri ale ka wa pagrisa alege m dan bo ale ni m ka wariya m abe kan biisi wa pagrisa. ¹¹ Nuru baai ale a weeni nna la, mi a yaali kama ayen ba seba ayen m dan jam ni jigi, m le pai ka m gbanɗa po wa pagrisa a biisi sak ni.

¹² Tama kan pai ti deka a magsi chaab ale baai ale a poli ayen ba ka nuru kpeenta la. Nuruma deka betta. Ba dueni ka ba deka sinsaga a yaa pai ba deka a magsi chaab ale ba sinsaɗa alege pai ɗa a bo ba deka buusa. ¹³ Tama kunkuulimaɗa a kan ɗmasi gaam a taamu. Ti a kuulim ka Naawen ale te ti tuim ɗaai ayen ti tom la nyiɗ. Ku de be maa gum ka nama ale nya varibasika ti tuimaɗa nyiɗ la. ¹⁴ Ti be kan kuulim gaam a taam dula ti poom biisi Yeezu Kirisita wie a sak ni kama. ¹⁵ Tama kan kuulim nuruba tuima nyiɗa ase ka tama ale tom la. Alege tama yiilaɗa ale, ni le ta siaka ale wa ate nama ale tama tuimaɗa a piisi a gum du. ¹⁶ Nama meena dan a va dila, tama ale nama le baka a tu chaab a mooli sak satɗi sii ale moata nama la Naawen wamaɗaɗa. Ti dan nyɛ dila, waai a kan baka weeni ayen ti a yaali kama ayen ti nya nyuenta nuruba tuima nyiɗ.

¹⁷ Ba ɗmarisi Naawen gbanɗa po dila po, dila po ayen, “Ni kan a yaali yue a te ni deka ni tuima nyiɗa. Ni a yaali yue ale ti Nyɔɔwa ale nyɛ dii la.” ¹⁸ Ni dan poom weeni ayen nama ka nuru maɗa ku ka kiri ya, ka Nyɔɔwa a nin weeni ayen ni ka nuru maɗa.

11

¹ Yogyogla de, mi a yaali ayen m nmarisi ka m dek wie gbanƙa de po. Ni ba gela a poli kama ayen m biika ka kiri ya. Ni be ta chichiiba nna magla ale mu. ² Mi a yaali ni ka nna yegayega a se Naawen ale a yaali ni dii la. Ni a nyɛ se ka nipɔkbili ale kan diem nidɔa la ate m puulim ayen m pai wa a te nuru yen nyiini, wala abe le Yeezu Kirisita. ³ Alege yogyogla de mi a chali ka yogsum Sitaana ale paasi yik ni popola ase wa le jam paasi iiv dii la, a chali yogsum me ni ale tagri ni popolaɗa a basi Yeezu Kirisita va ka. ⁴ Tama a biisi ka Yeezu wie a sak ni ate ni ta siaka ale ti biika ale tuesi Naawen Chiika. Alege ni basi kama ate nuruba gela a biisi biik a te ni. Ni be gomsɪ ni dek kama a siak ba biika ale tuesi chiik yon.

⁵ Ni a poli kama ayen sagroma de a gaam mi kama. Mi be kan siak a te ni. ⁶ Ku ka wensie ayen mi an baga a biisi nalimnyiini nuruba niɗa, alege m kan kpeeri yam. Daa meena mi a nyɛ kama ate ku sak ni ayen nyaku de ka wensie.

⁷ M le liɗ jam bo ale ni ate m jam sak ni Naawen wamaɗsaɗa la, mi an jam yaali tutuna ku nyiɗa. Mi yik m dek kama nama nyiɗ ayen ni chim nuru kpeenta. Dila an jam magsi ya? ⁸ Ni basi ate m weeni a sak ni ku ale jam ka dii la. Mi ale jam bo ale ni la, nuru baai ale jam bo niɗniɗ la, ba gela a jam pai tiirinta a te mi, ate ku a nyɛ nna se mi a zu ba kama a tom a te nama la. ⁹ Dai yen po ate mi ligra a yaa nueri, alege mi an jam begi ni ayen ni maari mu. M suaataɗa baai ale bo Masidoniya tenka po la, a jam pai nanta baai

meena ate mi jam a yaali la, a ta jam te mu. M jam kpesi ka m dek ayen m kan jam a yaali ayen ni a nya m zuwa. Ku le chim ka nna chum dii po me. ¹⁰ Mi a weeni ni ka wensie, dii nyinj la Yeezu Kirisita a bo ka m sunum po. Baai meena ale bo Akaaya la, le wom ayen daa nama ale a nya mi zuwa. ¹¹ Nama a poli ayen m kan yaali ni kama ale soa ate m yaa m nye nna ya? Naawen seba ayen mi a yaali ni ka nna yegayega.

¹² M kan tagri m ni a nye dii nna la, ate sagrama de a nya siuk a weeni ayen ba tuimaɗa ale tama tuimaɗa ka bunyi. ¹³ Ba daa Naawen wensie tuimtomɗoba. Ba ka velinvendis, dii nyinj la ba a paasi ni kama ayen ba sinsaɗa ale tama sinsaɗa ka bunyi. Ba tagri ka ba dek ayen ni poli ayen Yeezu Kirisita ale tom ba ni jigi. ¹⁴ Sitaana me a baga a tagri wa dek kama, ate nuruba poli ayen wa ka Naawen sabiiloma baai ale a nyagsi la wanyi. ¹⁵ Sitaana a be dan baga a nye dila, kuna toa ate wa tomteeroma a tagri ba dek, ate ni a poli ayen ba ka Naawen tomteeroba. Naawen a dan jam ayen wa bo ba buusa, wa le nya ba kaasunku kama abe wa basi ate ba kan ta kiri ya.

¹⁶ M poom nmarisi a weeni ayen ni ba gela a poli kama ayen yam ka m biika po. M be nman diem a saalim ni kama ayen ni ta chichiiba ale mu. Yogyogla de, ni basi ate mi me a yaali yue magla a te m dek. ¹⁷ Ti Nyɔnɔwa an jam sak ti ayen ti a yaali yue a te ti dega. Ka betta nyiini ale a nye dila. ¹⁸ Sagrama de a va ka ba dek njan yaalik ale a yaali yue me a te ba dek. Dila ale soa ate mi me a yaali yue a te m dek. ¹⁹ Ni a poli

kama ayen ni ta ka yam nna yegayega, alege ni kan beni ale a wom betta sinsan̄na de. ²⁰ Ni basi kama ate nuruma de a nyɛ ni se yom la, ale a nyɛ a de ale a zu ni ale a fobi ni. ²¹ Mi a chali chivie kama ale m le weeni ayen ti wobsa ale dila nyeka.

Ba daa kuulim mi me baga a kuulim kama alege ku la ka betta. ²² Ba ka Juuba? Mi me ka Juu. Ba ka Izirali demma? Mi me ka Izirali deno. Ba ka nuru waai ate ba a wi ayen Abraham la, n̄aan̄bisa? Mi me ka ba wanyi po. ²³ Ba a weeni nama kama ayen ba ka Yeezu Kirisita Tomteeroba? Ni le poli kama ayen mi a yesim kama, alege mi a yaali ayen m weeni ni kama ayen mi ka wa tomteerɔ nalimnyiini a gaam ba meena. Mi tom tuima ka nna yegayega a te wa. Nuruba a jam yik mi a lik ate ku paari ka dii choa, ale pai fiɲsa a miiri mu. M be jam tali ka maga ate m kpi. M gaam ba kama yegayega ale wien̄a de meena. ²⁴ Juuma a jam pai fiɲsa a miiri mi ka pisita ale neok. Ba nyɛ nna a paari ka ku noai bunu. ²⁵ Nuruba me a jam pai doa a nak mu ka buta. Nuruba me a jam pai tintana a yuk mu. Ba jam nyɛ nna ka bunyi. M be jam jo n̄aarunta po me ate viok kpion̄ jam fuk a yaa chiak ti a ta jueli pina zuima ate n̄aaruntan̄a a yaa kaasi. Nya ku de a saa ka buta. Dan di dai, ate mi jam wari nyakpeemu po yok ale kantuen̄ meena. ²⁶ Mi le kasim jam chen̄ jiga tɔgatɔga la, m jam chen̄ jigi baata ka nna yegayega. Mi jam lo bela a jueli kama. Bela n̄aai nyaata ale jam sueri n̄a a waan̄ ten̄ka meena. Nuruba a jam daani mu nalimnyiini ayen ba zu m n̄antan̄a ale

pagrim. Juuma ale baai ale kan daa Juuma la, a basi kama ate mi nya ninam nna yegayega. Baai dek me ate mi jam poli ayen ba ka m doaba la, a jam basi mi kama. Mi cheŋ sateŋ sii ale jigi ŋaai ale nya tii ate yogsum yegayega a boro la kama. ²⁷ M jam tom ka nna yegayega a ga gaam taam, ale ge jam basi m goom me ate ku paari diichoa. Nyanyuila ale kom a jam yik mu me. M be jam ka gatta me a piisi ya. Daa meena m jam ka vuusum jigiya m be ka ŋandiinta me. ²⁸ Wie ŋa chaab a boro kama ate mi an weeni a sak ni. Mi le kasim jam a yaali dii yegayega la ale, Yeezu ŋaanviirima le va wa nalimnyiini. ²⁹ Waai a dan ka a va wa nalimnyiini, ku a daani mu kama. Waai a daa tom tuimbaata, m sui ale kasim a kaasi ale nuru bala chaab.

³⁰ Mi dan poom a kuulim, mi a kuulim wa ŋaai ale a sak ayen mi wobsa la nyiŋ. ³¹ Naawen waai ale ka ti Nyonowa Yeezu ko la, a seba kama ayen m daa velinvendika. Ni basi ate ti a te wa pimpauk taam wuu. ³² Mi le jam bo sateŋ kaai ate ba a wi ayen Damasikus la, demma gominawa ate wa jam tom a te Aretas la, a jam tom wa sojima kama a weeni ba ayen ba zaani juijui meena ate nuruba a va a jo ale a nyini teŋka po a nyini la, ate ba бага nya mu a yik mu. ³³ Alege m doama a jam maari mu. Ba jam pai mu kama a nyo busik po a yaa pai miik a bobi busika a yaa basi ate m kali ka po ate ba zagri ka a ta va siaka ate ba se gilim teŋka la ate m siŋ teŋ. Mi le ga siŋ teŋ nueri la, m jam chali be kama, ate gominawa an ŋman jam nya mu a yik ya.

12

¹ Ku magsi ka m le kuulim alege kunkuulimaɗa ka maarika. Alege m le weeni Nyɔnɔwa ale pai wie ɗaai meena a sak mu la. ² Bena pi ale ɗanaansi ale ga taam la, Naawen a jam lueri nuru wanyi a ta jueli ga jo wennmazuk ku po. M ze a se dila sum nye kama yaase ku jam a nye se ka Naawen ale pai a sak wa la. Naawen nyiini ale jam seba dila. ³ Ni basi ate m ɗman weeni ni ayen Naawen ale jam lueri wa a yaa pai wa a ta jueli a ga jo wa jigi nalunƙu po. Wala nyiini ale seba a se ku sum jam nye kama yaa, ku jam nye se ka Naawen ale pai a sak wa la. ⁴ Wa ale jam ga jo dula la, wa jam wom ka wie, ɗaai ale chim wakperikaliisa ate wa an бага a weeni. ⁵ Ku magsi ka m ti a kuulim nuruwa de nyiɗ, alege daa m dek nyiɗɗa. M din bula a yaali kama ayen m weeni m wobsa dii la. ⁶ M dan weeni ni le ka dii la, ni kan ni a weeni ayen yam ka m ni a biisi dii la po. Mi a weeni ni ka wensie. M kan yaali ayen nuruba seba ayen m ka nuru kpionɗ a gaam ba, dii nyiɗ la Naawen ale nye dii a te mu la. Mi a yaali kama ayen ba bo mi buusa m tuimaɗa ale wienɗa nyiɗ.

⁷ Naawen an jam a yaali ayen m ta kanjanta wa le basi ate m wom bikperikaliika la nyiɗa. Dila ale soa ate wa yaa pai tuem a te mu ate m nyiɗka a kasim a dom daa meena. Ku a nye ka Sitaana ale a nak mu la. ⁸ Mi jam salim ti Nyɔnɔwa ka buta wannɗi de nyiɗ ayen wa nye ate tuemu basi mu. ⁹ Alege wa weeni mu ayen, “Mi niaka ale a magsi fu. Dii po ate fi wobsa la, mi pagrimu zuak kama nna yegayega a bo fi jigi.” Dila la mi sui

peenti kama ale m nin ta kanjanta m wobsumu nyiṅ. Dila nyiṅ m seba kama ayen Yeezu Kirisita pagrimu a lik mu kama. ¹⁰ Nuruba a dan basi ate mi a nya ninam, ale ge a daani mu nna yegayega, Yeezu Kirisita nyiṅ, alege m ka m dek pagrim la, m sui peenti kama.

¹¹ Ni daani mu kama dila ale soa ate mi a ṅmarisi nna ase m ka beruk la a te ni. Ka boan nyiṅ ate ni ba gela a kan te mu zula? M dek pagrimu ka pagrim kayiok, alege m kan va sagrama de baai ale a velim ate ni a poli ayen ba ka tuimtomdɔba a gaam mi la. ¹² M le jam bo dula ale ni la, ni jam ka chichama a se mi ka Naawen wensie tuimtomdɔ. Wa jam a maari mu kama ate mi a tom tuim kperikaliisa nna yegayega ale chichiiba a te ni. ¹³ Mi nyɛ ni kaasi kama alege an nyɛ Kirisita bisaṅa ale a tu chaab a bo jigi ṅa chaab la, kaasi ya. M dan poom nyɛ wari ka m le kan weeni ayen ni maari mu la. Ku be dan kan dila ni vonj a te mu.

¹⁴ M dan jam ni jigi ku yaa nyɛ ka m nantuok noai buta. M dan jam tu ni, m kan yaali ayen ni pai jaab a te mu. Mi a yaali ka ni dek daa ni ligra. Ni a nyɛ se ka m bisa la. Bimbaansa kan nya ba nyam zuwa, alege ka ba nyamma ale a nya ba zuk. ¹⁵ M gomsɔ kama ale supeentik ayen m kaasi jaab buui meena ale m ta la ale dek me meena ate m бага a maari ni. Mi a yaali nama kama, alege nama a kan yaali mi.

¹⁶ Nama dek seba chak kama ayen dii po ate m jam bo ale ni la, mi an nya nama ayen ni Maari mu. Nuru waai ale ayen mi a velim kama ale a paasi ni. ¹⁷ M vari ka ni ṅanta ale ni tom baai ni

jigi la. ¹⁸ M jam saalim Titus kama ayen wa jam ni jigi. Wa le jam siak la, m jam tom ka wala ale ti suoku wanyi ni jigi. Titus jam vari ni nanta kama? Nama ze ayen Titus ale mi suniimaɗa ale a poli dii la ka bunyi?

¹⁹ Nama a poli kama ayen tama a yaali ka yue gbanƙa de po? Dila daa wensie Naawen ale soa ti ate ti nmarisi wie n̄aai ate Yeezu Kirisita a jam pai a te ti la. M dek dɔaba, ti tuimaɗa meena le maari ni kama. ²⁰ Mi a poli kama ayen m dan jam ni jigi, ni kan ni a nye dii ate mi a yaali ayen ni a nye la. Nama me a kan yaali mi ale a nye dii la. Mi a poli kama ayen ni ale kasim a nak ka nampaga ale chaab ale a de nyuri ale chaab ale a ta sue ale chaab, ale a ta butuem, ale a le chaab, ale a bobri, ale a ta kanjanta ale a zeri ni kpanɗa noa. ²¹ Mi a poli kama ayen m dan jam ni jigi, Naawen le basi ate m yik m dek ni nin. M sui le kaasi kama, dii nyin la ni yegayega a kan yaali ayen ni basi ni kabonɗa tuimaɗa ale ni nipokyaalik ale nidɔayaalik tuimaɗa, ale ni tuim dantisaɗa yegayega ka abe ba.

13

¹ M yaa cheena ni jigi nna a nyeka buta. Ni a teeri dii ate ba nmarisi Naawen Gbanƙa po dila po, dila po ayen, “Fi dan a yaali ayen fi biisi gaam nuru waai, ku a fe kama ayen fi ta nuruba baye a yaa se nuruba bata ate ba chim fi seeroba.” ² Dii po ate m jam ni jigi a nye buyewa la, m jam kaam nama baai ale a tom tuimbaata la kama. Alege yogyogla de ate m yalima ale ni la, m diem a kaam ni kama ale waai meena me. M boro a

gomsɪ kama ayen m jam te ni waalika yegayega. ³ M dan jam ni jigi ni le seba nalimnyiini ayen Yeezu Kirisita a va mi nyiŋ biisi a te ni. Dila la m dan jam te ni waalika ni ale seba ayen mi an wobsa alege ka Yeezu Kirisita ale a sak wa pagrimu ni sunsuŋ. ⁴ Ba le jam yik wa a kpi jabarimu nyiŋ ayen wa kpi la, wa jam ka pagrim. Alege yɔgyɔgla de wa ŋman vua kama, dii nyiŋ la Naawen pagrimu nyiŋ ate wa nak wa a yiti kum po. Tama ale wa ale ka bunyi la nyiŋ ate ti wobsa, alege tama ale nama ale ka bunyi la ti le maa chaab a nya pagrim buui ale basi ate wa vua la.

⁵ Ni a nyɛ ni dek a nya a se ni ta siaka ale Yeezu Kirisita nalimnyiini ya. Nama seba ayen wa bo ka ni suniimaŋa po, ni be dan kan ta wa suniima po ni be an tagri ya. ⁶ Mi seba kama, ayen nama me dek seba kama ayen wa bo ti suniimaŋa po. ⁷ Ti a puusi a te ka Naawen ayen ni ka a tom dii ale kan nala la, daa ti sak ayen ti baga wamaŋsa kasim a nyɛ alege ni a tom a magsi ase tama a nin poom nyɛ wie a kpeeri. ⁸ Ti kan baga a nyɛ wari a kaasi Naawen wensiɛŋa alege ti a nyɛ a magsi chaab ale ka wa wensiɛŋa. ⁹ Nama a dan poom pagra alege tama a wobsa, ti sue peenti kama dila nyiŋ. Ti be a puusi kama ayen ni chiib za ale pagrim. ¹⁰ M ni kan bo ale ni la ale soa ale m ŋmarisi gbaŋka de a te ni ayen ni tagri, ate m dan jam abe m kan te ni waalika ale Nyɔɔwa pagrimu ate wa a te mu la. Wa pai pagrimu de a te mu kama ayen m maari ni daa ayen m kaasi ni.

¹¹ Ti suaata, yɔgyɔgla de, ti a yaali ayen ti

ɲmarisi ti gbanƙa a kpeglimka dela. M weeni ni kama ayen ni gomsɪ wie ɲaai ale kan yuarisi la a magsi. Ni ta noai yeɲ ale chaab, abe ni boro ale suyɔgini. Naawen waai ale a yaali ni la ale a basi ate ni a boro ale suyɔgini la, le maari ni ate ni nyɛ wienɔ de.

¹² Ni a puusi chaab nalinmyiini a te ti.

¹³ Naawen nuruma meena a puusi ni.

¹⁴ Naawen waai ale yaali ni la, ale ti Nyɔnɔwa Yeezu Kirisita waai ale a niak la, ale Naawen Chiika waai ale a nyɛ ate ni a ta noai yeɲ ale chaab la, a bo ale ni meena.

**The New Testament in the Buli language
(Ghana)**

**Buli: The New Testament in the Buli language
(Ghana) (New Testament)**

copyright © 2003 Wycliffe Bible Translators, Inc.

Language: Buli (Ghana)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 13 Jul 2024 from source files
dated 29 Jan 2022

24aad1ee-9f16-5a40-b094-5b16e513253a